



Građanska tužba za naknadu štete

Zainteresovana javnost ima pravo pokretanja sudskog postupka kako bi se osporilo određeno činjenje ili nečinjenje koje vrši fizičko lice ili organ uprave koje je suprotno odredbama propisa vezanih za zaštitu životne sredine.

Građani imaju i pravo na naknadu štete podnošenjem tužbe nadležnom sudu ukoliko su njihova prava povrijeđena.

ČLAN 200. ZOO FBiH – NOVČANA NAKNADA

(1) Za pretrpljene fizičke bolove, za pretrpljene duševne bolove zbog umanjenja životne aktivnosti, narušenosti, povrede ugleda, časti, slobode ili prava ličnosti, smrti bliskog lica kao i za strah sud će, ako nađe da okolnosti slučaja, a naročito jačina bolova i straha i njihovo trajanje to opravdava, dosuditi pravičnu novčanu naknadu, nezavisno od naknade materijalne štete kao i u njenom odsustvu.

Pravno priznati vidovi nematerijalne štete za koje se može priznati novčana naknada po odredbama Zakona o obligacionim odnosima su:

- 1) Pretrpljeni i budući fizički bolovi**
- 2) Pretrpljeni i budući strah**
- 3) Pretrpljeni i budući duševni bolovi zbog umanjenja životnih aktivnosti**
- 4) Pretrpljeni i budući duševni bolovi zbog narušenosti**
- 5) Pretrpljeni i budući duševni bolovi zbog povrede ugleda i časti**
- 6) Pretrpljeni i budući duševni bolovi zbog povrede slobode**
- 7) Pretrpljeni i budući duševni bolovi zbog povrede prava ličnosti**
- 8) Pretrpljeni i budući duševni bolovi zbog smrti bliskog lica**
- 9) Pretrpljeni i budući duševni bolovi zbog naročito teškog invaliditeta bliskog lica**
- 10) Pretrpljeni i budući duševni bolovi zbog krivičnog djela protiv spolnog integriteta, dostojanstva ličnosti ili morala.**

Naknada za nematerijalnu štetu se može priznati samo za onu nematerijalnu štetu koju kao takvu priznaje zakon, a ne za bilo koju nematerijalnu štetu.

Novčana naknada nematerijalne štete predstavlja za oštećenog satisfakciju. Da bi ispunila taj cilj mora biti cjelovito isplaćena u iznosu koji se određuje primjenom odgovarajućih kriterija u skladu sa zakonom.

Zastara potraživanja: Potraživanje naknade štete zastarijeva za tri godine od kada je oštećeni saznao za štetu i lice koje je štetu učinilo (subjektivni rok). Objektivni rok iznosi pet godina od dana kada je šteta učinjena. Ne može se govoriti o nastupanju zastarjelosti potraživanja sve dok štetne posljedice nastaju i dok nisu dobile konačan oblik. Tek prekidom daljeg nastajanja štete počeli bi teći navedeni rokovi.

Tužba za naknadu štete podnosi se Općinskom sudu u Zenici kao prvostepenom organu za odlučivanje o navedenom pitanju. U prvostepenom postupku sudi sudija pojedinac. Postupa se po Zakonu o parničnom postupku FBiH.

Stranke su dužne iznijeti sve činjenice na kojima zasnivaju svoje zahtjeve i izvoditi dokaze kojima se utvrđuju te činjenice. Stranke su dužne pred sudom govoriti istinu i savjesno se koristiti pravima koja su im priznata Zakonom o parničnom postupku FBiH. Parnični postupak se pokreće tužbom. Tužba mora sadržavati sve krucijalne elemente definisane zakonom. Tužba se podnosi pismeno. Mora biti razumljiva i mora sadržavati sve potrebne elemente. Osobito treba sadržavati: oznaku suda, ime i prezime odnosno naziv pravne osobe, prebivalište ili boravište, odnosno sjedište stranaka, njihovih zakonskih zastupnika i punomocnika, ako ih imaju, predmet spora, sadržaj izjave i potpis podnositelja.

Da li mislite da su vaša ljudska prava ugrožena? Ukoliko ste zainteresovani za pokretanje građanske tužbe za naknadu štete obratite se lokalnom konsultacionom Aarhus centru:



Eko Forum Zenica
Školska broj 10 – Prostorije Metalurg city centra,
72 000 Zenica, Bosna i Hercegovina
Pozovite nas na broj: 00 387 32 40 50 50
Ili nas kontaktirajte putem maila: info@ekoforumzenica.ba
Možemo vam pomoći da zaštitite Vaša osnovna prava!



TRANSITION